

MAZARIN

2737

Le Pater Noster De Mazarin

**RARE BOOK
COLLECTION**




**THE LIBRARY OF THE
UNIVERSITY OF
NORTH CAROLINA
AT
CHAPEL HILL**

Mazarin
2737

UNIVERSITY OF N.C. AT CHAPEL HILL



00023007461



LE PATER NOSTER DE MAZARIN

A V L E C T E U R.

*Il faut que tout homme de bien
En lisant ce Pater inique,
Au Mazarin fasse la nique,
Et dise enfin qu'il ne vaut rien.*

HELAS ! puis qu'aujourd'huy ma folle tyrannie
Par moy mesme est reduite à son dernier moment,
Et que pour mon malheur toute la France vnice
Peut avec liberté crier au Parlement.

Pater noster

Puis que pour habiter plus long temps cette terre,
Où j'ay pour m'enrichir tant fait de malheureux,
Sans redouter les coups de ton juste tonnerre,
Je ne m'oze resoudre à t'adresser mes vœux.

qui es in Cælis

Enfin puis que je voy contre mon esperance,
 Et malgré les efforts de mes inuentions
 Que ce funeste iour, où librement en France
 Chacun fait contre moy mille imprecations.

Sanctificatur

Prince des sombres lieux, demon de l'auarice,
 En qui j'eus ci-deuant mon vnique recours,
 Voulant faire éclater ma plus noire malice,
 Pardon, si je t'oublie, & n'appelle à secours.

Nomen tuum,

C'est de toy Nemesis, ma Deesse cruelle,
 Dont j'inuoque aujourd'huy la rage & la fureur,
 Disant, afin de voir defendre ma querelle,
 Et remplir cét Estat de carnage & d'horreur,

Adueniat Regnum tuum.

Mon ame sera lors pleinement satisfaite;
 Car quand je te veray ces peuples tourmenter,
 Deusse-je mettre en but & mes biens & ma teste
 Sans cesse à haute voix on me verra chanter

Fiat voluntas tua,

En vn vaste desert, vien changer cét Empire,
 Puny ses habitans par la flamme & le fer:
 Et s'il me faut perir pour croistre leur martyre
 Lors je m'estimeray dans le fond de l'Enfer

sicut in Cælo

Chacun m'imposera ces souhaits à grand crime,
 C'en est vn: mais quel bien pourroit faire vn damné?
 Je le suis, puis qu'he las! d'un Arrest legitime
 Déjà dedans le Ciel je me voy condamné

& in terra,

Cy-deuant j'ay tenté par l'aveugle discorde
 De contraindre Paris par la voix du Senat
 A venir deuant moy crier misericorde,
 Et me dire à genoux Pere de cét Estat.

Panem nostrum quotidianum

Mais tendis qu'enragé, pour les perdre j'employe
 Et la peau du Renard & celles des Lions,
 Ils exposent mes biens & mon Palais en proye,
 Et chacun à l'enuy me dit nos millions.

Da nobis

Quoy ne sçauent-ils pas qu'ils font la recompense
 Des grands biens que je fais au Monarque Louïs,
 Quand pour vn Iule seul qu'il fait regner en France,
 Par moy tous ses Louïs regnent en mon païs?

hodie

S'il va de l'intérest des Rois & des grands Princes
 D'auoir en mille endroits mille pretentions:
 Sire, pour en auoir dans toutes les Prouinces
 Les monstrueux tresors de nos concussions.

Dimitte nobis

Que si vous écoutez ce Parlement critique,
 Que la peur du trespas n'empesche de crier,
 Il vous dira (grand Roy) qu'en bonne politique
 Il faut outre l'argent nos vies pour payer

Debita nostra,

Mais pour donner le lustre à cette haute estime
 Que suiuant nos conseils vostre regne s'acquiert,
 Sire, il faut rejeter cette austere maxime,
 C'est dequoy l'Italie humblement vous requiert

sicut & nos

Car s'il faut qu'aujourd'huy nous rendions à vos villes
Ces immenses deniers que nous leur auons pris,
Grand Roy c'est mettre fin à nos guerres ciuiles,
Et n'en remportans rien que la honte pour prix.

dimittimus debitoribus nostris:

Mais quoy, bon gré, malgré s'il faut qu'on restituë,
Ah! Madame, pour lors je me jette en vos bras:
Et s'il plaist au malheur que le peuple m'y tuë,
Receuez mes adieus, & si près du trespas

ne nos inducas in tentationem:

Ou bien pour m'empescher de reuoir ma patrie
(Je veus dire l'Enfer ou le Romain climat)
Madame, avec deux fous sauuez nostre partie,
Et ne nous laissez pas donner échec & mat.

Sed libera nos

Autrement je n'attens de nos fiers aduersaires
Que l'extreme vengeance où vous mesme aspirez:
Pour vous, ne craignez rien, vous ferez vos affaires,
Disant que ces desseins vous furent inspirez

à malo.

François, si mes amis me disent qu'il m'importe
De finir par Amen cette mienne Oraison,
Alors je vous diray que le Diable m'emporte;
Car j'espere à ce mot d'en auoir à foison.

Amen.

